

四庫全書

集部

欽定四庫全書

集部
栢齋集卷十

詳校官中書臣孫溶

中書臣劉源溥覆勘

總校官中書臣朱鈐

校對官學正臣陳木

謄錄監生臣曹錫爵

欽定四庫全書

栢齋集卷十

明 何塘 撰

碑銘

追封鄭定王碑銘

嘉靖十二年正月十五日宗室鄭王殿下遣審理副周廷蘭來諭塘曰予祖東垣端惠王乃予曾祖簡王之子伯祖僖王之弟伯考康王之叔父也弘治十六年薨逝

蒙朝廷賜謚祭塋訖正德二年康王薨逝無子予先考懿王以倫序當襲蒙朝廷授以冊寶進封鄭王先考即奏乞追封祖為鄭王該部以前無事例寢其奏不報正德十年祖妣李氏薨逝蒙朝廷欽賜祭塋亦止從郡王妃典禮先考懿王享國十三年薨逝乃嘉靖七年予母妃追念先王之志未伸復援唐府事例奏乞追封祖為鄭王欽蒙聖恩准進封鄭王改謚曰定祖妣亦進封鄭王妃各賜以金冊已告廟謝恩外茲欲立碑墓前以彰

聖天子之恩母妃之孝以慰我祖考妣及先王在天之靈幸為予撰次始末勒碑示後塘拜受命竊惟人子之孝莫大於尊親然或拘於分而不得或拘於時而不得故人子能全其尊親之孝者甚難仰惟我聖天子由宗藩入承大統初議追尊考興獻王為皇帝以廷臣爭議不決亦踰年而後定其難也蓋如此我東垣王追封鄭王恩典先懿王奏請而未得今母妃奏請乃始得之是固孝心相繼所致然非聖天子在上推己尊親之心以

逮臣下亦安能致得之之易如此哉然則聖天子之恩
烏可忘也立碑墓前昭示後世今王之志甚善塘謹拜
手稽首而獻銘曰人子之孝莫大尊親孝心得遂天下
幾人請封鄭王懿王之孝部議弗從沒身是悼王妃繼
請乃行追封煌煌金冊賁於泉宮王妃之孝王實導之
天子之恩何以報之今王對揚立碑墓前稽首頓首天
子萬年

墓誌

封太淑人何母劉氏墓誌

嗚呼此塘母太淑人祔葬塘父工部府君之墓也太淑人姓劉氏世為懷慶衛人父諱鉦字子珎讀書通大義家法甚嚴繼配郭氏有賢行寔生淑人淑人資稟既異又漸染家教故女德女工有過人者年十八歸我先考工部府君事舅姑能孝治家勤儉有法家嘗中哀淑人相先考辛苦自立不求於人惟以教子讀書為事弘治壬戌塘舉進士甲子授翰林院編修蒙封先考編修封

母孺人正德初年太監劉瑾用事瑋與之不合乞致仕
歸未幾瑾敗行取復職復以經筵進講忤旨謫開州同
知轉東昌府同知丙子復乞致仕歸侍膝下辛巳先考
棄背是年今上即位以薦者言起瑋為山西提學副使
以居憂不赴服闋改浙江提學副使居一年陞南京太
常寺少卿轉正卿嘉靖丁亥陞南京工部右侍郎明年
遇例加贈先考南京工部右侍郎加封母太淑人是冬
改北工部十二月至京改戶部踰三月改禮部俱右侍

郎而塘病矣乞歸蒙陞南京右都御史致仕幸得侍淑人膝下首尾十年而太淑人棄背矣嗚呼痛哉太淑人性嚴毅塘輩有過輒以大義責之塘輩恒凜凜焉故得免於大惡訓戒之言今不復聞矣痛哉痛哉淑人生景泰丙子九月四日辰時卒嘉靖戊戌二月十五日申時享年八十有三生子男二長曰塘即不肖娶周氏次曰璋娶張氏女二長適處士秦子隆次適府掾傅選孫男三長曰光祖娶薛氏次曰顯宗娶劉氏繼娶陳氏次曰

延祚娶秦氏俱生員孫女七長適生員王世綸次適生員劉廷珮次適國子生蕭鷹次適國子生郝九疇次適國子生傅良德次聘官舍鍾鑰一尚幼曾孫男二長曰詔聘蕭氏次曰詢聘張氏曾孫女七長聘郭鈴次聘吳大英餘俱幼卜以四月十八日啓工部府君之窆而祔塋焉瑯病廢不能乞銘於名公大人收淚謹述淑人世行大畧以誌於石至痛無文故不銘云

墓誌銘

教諭張公配孺人王氏合墓誌銘

正德八年冬十有一月刑部主事張孟復先生以奉命
審刑至開州公事畢揖瑋而進之曰弘治癸亥十二月
十一日先考教諭公卒塋儀封縣西留陳鋪之東原秉
衡實為誌正德丁卯四月十三日先妣太孺人復棄背
以河患未克祔塋茲便道歸將卒事誌以記執事固以
昏亂冗併辭先生曰誌吾已具狀煩一櫟括耳乃受命
先生既至儀封乃使使齎狀授瑋狀若曰先妣姓王氏

曾祖諱景春祖諱亮父諱興俱力農晦德先妣幼有令聞先考喪前妣李氏擇嗣內事乃歸先妣先妣婦道甚飭且性明斷有丈夫風雖閭外事與聞者一切匡輔先考加敬禮焉成化己丑始生原明時先考春秋高先妣每齋戒禱曰吾得見此子成立可當門戶足矣而教愛周至原明少長先考教以讀書作文先妣恒分紡績之燈與同起止故原明不敢休怠少自樹立幸得領弘治乙卯鄉薦時二親在堂二孫獻喜膝下冀沾寸祿少酬

罔極不幸相繼棄背今雖叨甲科有職事親不逮矣痛
何言哉先妣姓至孝事姑以愛敬聞隨先考居官時每
寄物事於母曰吾姑已矣吾何用愛焉平時訓原明者
甚至病且革猶曰汝生長明時毋墮先志以忠朝廷吾
歸張氏有子也言猶在耳痛哉先妣享年七十有二子
一即原明正德辛未進士女四長適王郁次李鳳次李
雍熙次闕承賢俱士人孫二曰立曰可先考世行官壽
具秉衡誌先妣以正德癸酉十二月八日合塋嗚呼懿

哉太孺人之行也婦孝妻從母愛而教足媿德教諭公
矣同藏何憾是宜銘曰孺人相夫敬戒無失為婦為母
賢聲四溢粟如豁如維是玄室百年同藏以永終吉

汝北縣主墓誌銘

嘉靖八年七月六日汝北縣主以疾卒于正寢孫九成
等卜以嘉靖九年十月十日啓厥祖儀賓馮公之窆而
合塋焉先期以其姻黨張上舍所撰狀來請銘按狀主
迺涇陽安靖王長女也王性嚴有家法而王妃張氏復

有賢行故主之生也天性聰明惠順謹默甫十歲王命
讀書寫字凡皇明內訓孝經列女傳等書皆王日逐所
親授至今朱翰宛然主隨授即曉大義稍長事女紅精
緻過人王曰汝王家女何勤勞迺爾主曰此女子內分
事不可不知豈專於讀書寫字而已王善之王或有所
盛怒主婉詞以諫王亦為之霽威年十六受封汝北縣
主至十八歲請婚於朝命下選鄭府儀衛司儀衛正馮
宣次子恕為儀賓封亞中大夫儀賓父母在堂主時問

起居飲食衣服必躬必親然後進曾無驕容儀賓好博奕主勸以琴書儀賓好花草主勸以種植儀賓好朋友主勸以擇友夫婦愛敬如賓曾無反目且不苟不忌宮中侍婢皆敬服愛慕曾無怨言雖處富貴自奉恒儉姻親有匱乏者必周卹賑貸曾無靳色比舅姑繼沒塋塋務從其厚時祀務尚豐潔內外賢之弘治五年遣子繼勛遊郡庠弘治九年儀賓偶感疾卒於正寢主服喪三年未嘗有喜色恒勸子曰汝父早逝汝當及時向學以

圖顯揚勿怠荒以貽汝父九泉之憂弘治十五年子繼
勛又卒主移哭夫之哀而又哭子嗚呼痛哉二孫尚幼主
朝夕撫育常語子婦胡氏曰忠臣不事二君烈女不更
二夫古人此言深有道理胡氏感激悲號誓死無他志
姑婦節孝孀居人無間言二孫已成立主遘疾且革召
二孫語曰汝祖早逝汝父亦早逝汝不能見矣汝母亦
五十餘汝當勤謹孝養汝兄弟亦當和睦吾死亦瞑目
矣餘弗他及言訖而逝主生於景泰六年六月六日享

年七十有五子男一卽繼勛也娶兵馬指揮胡銘次女
孫男二長曰九成娶郡人沈鵬女繼娶郡人韓堂女次
曰九思娶郡人張約女孫女一適兵馬指揮閻敬子廷
琮曾孫男六曰尚仁尚義尚禮尚智尚信尚溫曾孫女
二俱幼嗚呼主在宮為賢女出宮為賢婦終而為賢母
皆卓乎不可尚矣予幼讀詩見王姬之肅雍共姜之守
義未嘗不歎其賢及觀史傳所載姬主多驕情不謹以
為古之人後不可復見也未嘗不深加悼惜今觀汝北

縣主事舅姑盡其孝相儀賓盡其義宛然王姬之肅雖
也勗子婦以貞烈自守撫二孫咸底成立視栢舟之自
誓殆有過焉此固可見人性之善無古今之異蓋亦由
我皇祖治家有法故宗室薰陶漸染而姬主之賢有如
是也嗚呼休哉是宜有銘銘曰先王教化始於閨門王
姬侯女禮義是敦降及後來教化淪替放蕩驕矜青史
斯穢縣主之賢古風尚存勒茲貞石以詔後昆

憲副吳公墓誌銘

嘉靖十年十一月二十五日致仕山西按察司副使吳公以壽終於正寢子守誠等卜以十二年春二月二十九日塋公於祖塋之次先期以狀請塘銘公壙中之石塘於公為後進公以名德爵齒為鄉達尊乃折輩行與交閒居相見教愛備至塘雖疎懶不能日侍杖履然心實歸仰焉今公不可見矣銘又安忍辭邪公諱道寧字世安別號繼公按狀公之先為浙温州之潭頭人國初徙居南京晚市父維成化初任溫縣教諭嘗夢於黃河

中流蓋樓因曰吾當於河內起家遂占籍河內焉公自幼篤實無妄言與弟道隆同受學惟務窮理不尚詞章枝葉教諭公嘗曰道寧為學如錘鑽毡遲透終不迷也道隆為學如錘鑽毡即透即迷也成化丁酉中河南鄉試禮魁戊戌登進士第授鹽山縣知縣迎教諭公以養政餘定省教諭公每舉古語以訓曰但存方寸地留與子孫耕故公居官恒以慈愛為本節民財力為先至於徭役一事尤加用意故復業者接踵而至百姓愛過父

母三載以政績卓異陞監察御史彈劾激揚風裁凜凜
弘治初年河內民奏開廣濟渠不果行是時公巡鹽河
東適勘鹽引十萬應否充給河南官軍俸糧公曰俸糧
吾省利廣濟渠吾府利均為國家利吾兩成之達諸河
南撫按後渠成溉民田甚溥巡按真定等四府貪酷望
風解綬先是開州有巨寇為一方深害交結權姦莫敢
誰何公設法捕獲戮諸市曹人心大快弘治十一年陞
山西按察司副使奉勅整飭鴈門等三關兵備創築寧

武新城設寧武所及沿邊堡寨俱募軍充實武備一新
邊人有賴後以疾辭歸惟以耕讀為事每訓子曰汝祖
三十以後始奮發讀書或夜無油就月色讀尚能明禮
經中式刊文汝俱年富燈火不須營幹正宜努力諸子
或不能背書即掩卷朗誦一遍曰我年六七十尚能背
誦汝後生反不能邪諸子感奮力學守中遂登進士第
正德初廣濟渠通塞不時公因泝流窮源相度地勢直
抵五龍口嘆曰使渠由此而行數世之利也今不二十

年而塞蓋創始者失地利耳遂達諸當道違廣濟舊渠
三四里許另開利人渠曰舊渠如此故失利新渠如此
乃得利刀民百計沮撓往返五年而後渠成水利至今
賴之濟水國初遼府城東流入河公因開利人河見其
南流曰此古蹟也豈可興今利而忘古利哉達諸當道
修架橋六座新流從上濟流自下二利並行而不悖林
下優游三十餘年身體康強未嘗有疾年八十五六時
每遇別墅花卉春佳秋禾告成扶杖觀翫往返步行數

里臨終不及已事第謂諸子曰汝等不須憂貧但教子
孫讀書為上策耳公生正統癸亥十一月二十日巳時
享年八十有九配金氏累封恭人先公四年卒側室三
職氏黃氏戚氏戚先於正德九年卒子男五守誠引禮
舍人守敬生員守中廣平知府守和早卒守經儀賓今
更名模女四淑清適生員董志學卒淑淨適指揮劉傑
卒淑淵適指揮沈隆卒淑貞適散官蕭拱暘男孫七大
夏生員大韶大讓大徵大英大福大節俱幼女孫十善

琮適百戶宋學善璜適生員張思齊善環適典仗焦繼
芳善珮適生員孟永增善瓊聘指揮薛守直長子善琅
聘守備顏齡長子善玗善琬善珠俱幼瑋竊聞有大德
者必得祿位名壽而徵之於世或不盡然故君子或疑
於天道之難信今觀公居官則名實加于上下居家則
惠利及於鄉黨人固已愛而敬之矣而忠信謙抑不以
尊貴驕人雖閭里童稚亦以禮待之故無遠近大小皆
稱公為大賢君子位至方面年至耄耄祿位名壽蓋兼

而有之矣而子孫多賢又有出五福之外者天道豈真不可信邪是可以傳不朽矣是宜有銘銘曰大德獲福自古所傳徵之於世或不盡然嗟嗟吳公盛德君子名在憲堂惠留閭里有爵有祿亦既顯榮百年康健壽考令終玄堂孔堅不震不圯公其永寧貽慶無已

宿州吏目仇公墓誌銘

潘藩儀賓仇公將以明年二月朔旦塋其從兄宿州吏目公於先兆之次乃具書狀禮幣走使來懷慶請銘於

瑯瑯雅聞公昆弟賢又辱在相知之末故不可辭按狀
宿州公諱楫字時濟世為潞州東火人高祖諱敏國初
為兵科給事中曾祖諱述芳業醫祖諱鏞援例授七品
散官考諱鶴義官妣張氏繼母閻氏兄弟三人公為長
仲曰朴義官皆張出季曰欄醫學典科閻出公天性聰
慧八九歲即通算人皆奇其敏悟既而從學於陵川致
仕教諭姬先生彰習舉子業甚有志於科目時兩伯父
皆蚤逝儀賓弟居城中諸弟尚幼家事乏人贊理乃以

父命援例入為國子生卒業即代父綜理家政內外得其歡心一日從弟監生桓城居偶疾城距東火八十里公聞之雪夜往視至城下夜方半門啟詢其由為當道者傳報也議者曰王城路非衝要夜半門啟實難遇也非君友愛篤至何以致此後仕為宿州吏目臨民蒞事不事鞭朴惟以理勸諭之初事似不克速濟太守黎公每咎其迂曰宿民汝可以德化耶後不一年百姓感戴如父母凡遇公事民趨赴勤如子姪黎公慨然嘆曰吾

不如子黎公君子人也遂相契如至親一日因踏看境
內災傷公躬往村落之民皆扶其父老迎拜道傍公即
下馬為禮曰老者安之不當如此勞動父老咸曰子孫
每從公府來者皆言衙門開設以來愛民之深者無如
父母官願得一見也居民在在皆然未幾上司有大書
贊政勤能之獎歷俸未二載外艱訃至公號慟不自勝
弔者皆為垂涕即命家人束書歸太守戀戀如失手足
宿民皇皇如捨父母徒隸來護送者人馬幾百數途中

屢命其回竟無一人先返者公至境望門抵家號慟幾絕者數次凡送死之禮無不極其誠信時烏鳥羣集於屋去而復至者月餘議者以為公孝誠所感大事既襄不御酒肉不歸寢室戚戚其容者終制禪祭既畢遂家居不起慨然欲化一家一鄉如三代之風於是上孝老母下友諸弟建祠堂祭及高祖以下四世神主報本追遠之誠無不曲盡立家範錄自冠昏喪祭及事物細微訓後齊家之則靡有闕遺營義房一區於家敦請鄉先

生以教宗族子弟免其束脩再起義學一所於里以訓鄉黨童稚資其薪水設醫藥以濟窮鄉有疾病者置義塚以塋逃屋無墓地者作禮衣深衣女轎燈籠諸物以助行冠昏者備大輦布巾香案儀節等具以助行喪祭者又請鄉彥數人相與講明家禮使其贊而行之已而一鄉二三戶喪塋咸不用浮屠昏嫁皆不惑術士復刊印三原冢宰王公註釋太祖高皇帝木鐸訓辭數百冊本鄉人給一冊勸其講而行之正德戊辰歲六七月大

早公率鄰村父老數千人齋戒沐浴於山林壇廟露頭
跣足減食跪香即日大雨方數百里三日乃止人皆服其
惻誠可以感動天地辛未歲流賊入境家人皆避之賊
傳言聞仇氏多馬出馬則庶得保全否則必火其室公
曰室可火而馬不可以資賊賊遂大火其室而退賊初
至搜掠婦女間有死節者四人賊退公不悲其家之災
而獨憐四女之死乃述事狀授儀賓弟俾轉達當道後
旌表門閭又舉行藍田鄉約每月望一會同約之人務

在德業相勸過失相規今月某人行何善事即書於勸善簿某人行過惡即書於懲惡簿畢乃序坐談論理家孝弟之事酒飲微醺即止有大惡者出之嘗對鄉衆曰姦盜之事最所深惡有能捕獲者吾賞錢一千盜田野穀豆者賞粟一石蔬菜者賞粟五斗數年之間盜賊欲跡帷簿甚嚴素醺酒者沈醉而不言素健訟者得理而亦忍於是翕然閭里和睦時有征鴈宿於門右古木相應和鳴至旦而去議者曰鴈非棲木之鳥其性正而有

序今夕之來棲因公修身睦族所致也公自家居罕入
城市雖鄉飲亦不往曰無功於朝廷不敢虛領其賜也
開樂休園一所鑿池種蓮坐知止亭上明窓淨几以琴
書自娛撰為八景墨客詩人往往題咏有八景詩集藏
於家每戒子弟曰衣食饒足即為富矣何必多積金帛
凡借貸錢穀惟輕取利息庶合古人貧富相資之意其
濟宗族惠鰥寡周窮恤困之事晚年尤篤至是以疾卒
於正寢弔者千餘人莫不灑泣公生於成化四年二月

二十六日卒於正德十五年十一月初九日享年五十
有三塋於陽堰原從先兆也公娶李氏陵川縣禮義里
旌表六世同居義門濯之女早卒繼邵氏本州東關村
士人訓之女亦早卒再繼孫氏潞州衛千戶舍人仁之
女生子三曰勲義官李出配義門義官玪之女曰炳聘
本州陰城村知縣李素曾孫夢陽女曰煌聘梁家庄士
民劉彥彰女女一曰德恩尚幼皆孫出孫男一曰塙聘
本州西火鎮士民焦琦女孫女二曰弄瓦弄碗皆幼嚙

呼吾聞仁人君子在一鄉則化一鄉在一國則化一國
在天下則化天下觀仇公之所履行感動可謂仁人君
子矣而官止於一幕壽不逮六十俾不克究所施設豈
非命耶昔漢陳仲弓為太丘長名重天下至於今稱頌
之者不衰當時豈無貴官豈無高壽而天下後世所仰
慕者乃在此而不在彼然則仇公亦可以無憾矣乃為
之銘曰孰親其親孰仁其民嗟嗟仇公今之古人胡小
厥施胡嗇厥壽彼蒼茫茫孰任其咎德修於家化行於

里百世可傳是云不死

仇母閻孺人墓誌銘

閻孺人者潞東火仇氏之生母也嘉靖壬辰冬十一月十有六日以壽終于正寢子朴等卜以來年春二月十有一日祔孺人於其考義官之墓先期以姪熙所撰狀具書幣俾來請銘予雅重仇氏家法之美及其昆仲之賢暨觀狀乃知皆成於孺人之教噫孺人可謂賢母矣是豈可不傳按狀孺人姓閻氏潞西火鎮處士素之第

五女也性聰慧年七八歲時聞祖閭三翁訓戒即知以禮自守無故不出戶閨少長依嫂李學女紅及笄凡鍼黹鍋竈紡織蠶桑無不精曉祖父母父母皆鍾愛焉他姓求婚皆不許成化十三年義官仇君鶴喪偶張氏厥考散官翁乃託執友李君禎求為義官續絃於閭三翁翁慨然許之曰吾非富仇氏也其家孝義義官良士吾孫女得所歸也張氏遺二兒俱幼孺人合卺禮成次日即抱幼兒於私室人以為難未幾二兒衣履一新舅氏

見之喜曰吾二孫得託吾憂舒矣輪當主饋舅戒以勿
妄費米麵鹽醋及諭以起家艱苦之意孺人奉命惟謹
輪當碾磨及醞釀醬醋醃治蔬菜紡織染練之類舅亦
諄諄戒之孺人所作無不精潔悉中舅意舅喜曰吾兒
婦能聽吾言必能成吾家者蓋自後亦不復戒矣是時
舅總家政伯兄貞篤先生主錢穀義官君兼管門戶成
化十七年貞篤先生物故遺子森甫十四歲桓方五歲
女猶在娠義官君獨任家事內蓄孺人收藏式克贊相

絕無私假私藏之議成化二十年兄子森選為內丘王府上艾縣主儀賓營造府第凡工匠飲食之需孺人悉供給不怠及府成義官君謂孺人曰縣主將出閣首飾尚未備你與二嫂有金可各出數件為用孺人即罄收以獻義官君笑曰汝能先於二嫂耶弘治九年兄嫂丁卒遺女適潘陽衛指揮張淮粧奩悉出孺人之手無不從厚女嘗謂叔母待我過於親女孺人待子姓雖慈至於教之甚嚴諸子皆教以義方子欄甫八歲即遣從師

讀書時或喜戲即訶之不改即笞之曰失教即為敗子
故欄讀書尚禮為時名人十五年春子楫選為宿州吏
目孺人戒之曰吾兒須要清慎勤謹以報國恩故楫在
宿州盡心職務致上司有贊政勤能之獎十六年七月
義官君物故孺人乃忍痛率諸子經營家務具朝夕奠
如禮九月楫至自任既塋乃與弟儀賓森及諸弟議立
家範以成先志白於祖妣陳及孺人孺人曰爾父嘗言
西院大伯收得鄭氏旌義編一本好書成家者當以為

法爾等能成父志立為常規期於久行爾父地下亦當
欣悅矣後揖舉行藍田呂氏鄉約以厚風俗作義學以
教子孫及鄉之秀俊孺人皆獎勵而勸戒之正德六年
端午日或報流賊千餘人已到趙村諸子曰母親同諸
婦可在鄰家一避孺人不可即督諸婦由間道以趨州
城賊至諸子亦以遠避使人傳言索馬不與遂火其居
孺人在州城三月與縣主相接以宗室待之縣主則以
姪婦自處世相親愛秋初賊遯王師凱還金鼓動地或

勸孺人出觀孺人曰賊火我室吾兒卧瓦礫食燒穀以存性命吾忍觀鼓樂邪初賊退諸子即修葺房舍少完迎祖妣陳及孺人歸舊居九年祖妣陳以壽終孺人哀毀盡禮十五年子楫病卒孺人哭大慟孺人性好節義聞姪森修四貞祠及親族生員閤誡妻程氏夫死自縊及李曉妻未醮夫死歸夫家持服事姑皆加獎勵尤好周卹遇歲饑輒周賑於里之貧者親疎有差無有不徧姪森及子朴繼欲建東山書院延耆儒以教子弟及鄉

之俊秀以廣義學之意孺人復勸成之嘉靖十一年七月七日孺人感風疾卧床子朴欲置田百五十畝以供義學先生束脩之用白於孺人孺人復首肯之蓋其教子尚義之心至老而不倦也至十一月十六日戌時病亟乃卒孺人生天順四年十一月二十六日戌時享壽七十有三子男三長楫任宿州吏目先卒娶李濯女繼部訓女又繼孫仁女次朴義官娶王陽女繼義官路俊女又繼董祥女皆前張氏出又次欄醫學典科娶知縣

王綸女繼李思聰女女二錦菊適千戶申琇封宜人先
卒繡菊字郭邦鎮幼殤皆閭孺人出孫男四曰勲義官
娶李氏曰煥生員先卒娶李氏曰炳娶李氏曰煌聘劉
氏先亡孫女八一季冬字李鈞先亡二德裕適武思彤
三德恩適生員焦謨四德邵字李皆五德重字袁逐六
德備字生員申去垢七德地八德慎曾孫男四一塢娶
焦氏二堦聘袁氏三培四垚曾孫女五一弄瓦適王克
耘二弄碗字賈克明三弄枕四弄車五弄旆予竊惟人

家盛衰固由男子主之於外婦人贊之於內易家人卦
以父母為嚴君復以男正位乎外女正位乎內為治家
之要垂訓遠矣今觀孺人事舅姑以孝事夫子以敬待
妯娌以和教子孫以義雍雍於宮肅肅於廟凡妻道婦
道母道無有不盡可謂賢矣至身為主母又能贊成家
範率諸婦躬行於內以致家道有成諸子稱賢尤為可
頌昔文伯之母及孟母范母陶母皆以能治家教子留
芳簡冊孺人蓋有與之相上下者是豈可不傳是宜有

銘銘曰仇母孺人百年以備撰詞勒石傳於世世

處士仇時表墓誌銘

嘉靖乙未冬十二月二十一日潞安處士仇時表以疾卒於正寢卜以明年二月十七日祔塋於陽堰祖塋之右其從兄義官公朴命其從子熙撰狀乃具書幣遣使來徵銘於予予發書痛悼念昔正德辛巳予丁先父憂時表奉其兄儀賓公森命來弔奠相度閑雅予深敬慕焉別去今十五年矣嘗念無由再見而今則已矣痛哉

痛哉誌銘之託又安忍以衰老辭也處士諱桓字時表
別號和節居士嘗為國子上舍不稱而稱處士從其志
也仇氏世為潞安東火人高祖敏給事中曾祖述芳醫
士大父鏞散官父鴻積學不仕既卒都憲虎谷王公私
謚為貞篤先生母丁氏於成化十三年十月初十日生
處士處士生而淳篤寡言笑方匍匐與羣兒戲不爭年
十二補郡庠弟子員郡守馬公掌教劉公深器之十九
齡廩食一日與儀賓兄省母惟山兄束金衣繡騁天賜

馬處士青襟楚楚光彩逼人見者莫不嘆羨一山翁李
姓者曰我僕事貞篤君最久稔見其盛德廣濟惜天不
假年今二嗣榮耀至此足以少酬其志於地下矣言訖
泣下聞者嘆息母病同兄籲天求以身代及卒哀毀踰
禮又念父終方幼遂設主同母靈追奠三年不御酒肉
服闋強學力行期以大顯厥親屢中里選而不入鄉書
鬱鬱成疾後膺例輸粟濟邊肄業胄監未畢嘆曰遘疾
求仕於義安乎即日告歸隱於山谷間授受生徒誓不

仕進叔父義官公鶴卒處士哭曰吾少失怙所賴者有
叔在堂時賜訓誨耳今又不幸至此慟哉助兄吏目公
楫克襄大事即同議舉行家範鄉約等事少暇則讀古
人書湯陰馮氏子以心疾浪遊太行間處士試其文可
進遂館穀之居無何馮疾痊肆力於學值大比秋處士
領儀賓兄命渡壺口下羊腸躬送於家其年馮以禮經
魁中州聞者義之處士又以父母及叔父俱去世獨叔
母間在事之甚孝旦夕溫清不異所生每得四時鮮物

薦祠畢即以奉焉與諸昆弟處甚雍睦人不知其為從兄弟也叔母閭卒從兄義官朴弟典科欄墓居終喪處士率再從子勲等綜理家政凡錢穀出納以時有稱貸者一遵家範以貧富相資為意不孜孜求利而奉喪祭待賓客行慶弔周貧乏以至畢子女之婚嫁供有司之賦役率自有餘百無一失蓋其天性寬厚而篤於守禮故平居雖自奉清約而於物亦無所吝性不喜飲酒而燕客則必盡歡御家無疾言厲色僮僕有過恒矜其愚

而宥之課諸子及羣從子弟諄諄以詩禮是訓曰不爾
則無以立身乙未九月偶感脾疾自度不起猶強言笑
以慰家人一日召諸子於床下屬之曰汝輩讀書勿徒
事篇章以供口耳之資須將聖賢言語深求玩味實體
諸身以見於行事乃為善學我碌碌庸人虛生於世汝
輩勿以為法也又數日乃卒弔客及門者千有餘人皆
曰善人沒矣無不揮涕此足以觀其德之所感矣處士
享年五十有九配李氏旌表義門滌之四女也子二俱

李氏出長曰火聘西火鎮程蘭之女次曰吳聘鄉賢大
司馬蔭城李公八世孫珊之女女一側室邵氏出邵同
女俱先卒火淳篤無偽吳穎悟絕羣他日代處士顯親
者必此子也且二子侍疾親嘗湯藥居喪能知哀戚有
可觀者咸以為處士之化予竊惟古之賢人君子惟以
積學修德為急至於仕隱則隨乎時如龐德公管幼安
王彥方黃叔度諸人隱而不仕彼豈碌碌庸人哉蓋其
胸中抱負遠大以道與時違而不屑仕耳故雖隱居獨

善其風聲氣節亦足以感化當時流芳後世今觀狀中所載處士之言行風旨蓋亦有所抱負而不屑於仕者其殆龐德公諸人之流乎是宜有銘以傳後世銘曰賢人君子仕隱隨時仕而碌碌孰與隱居處士終隱高情巨測後世徵賢視此幽刻

封安人許氏墓誌銘

安人姓許氏元魯齋文正公六世孫皇明魯府審理之幼女而四川按察司副使郝玉卿之繼室也審理諱偉

字李高娶霍氏寔生安人安人性聰敏讀書通大義女
紅閨範咸極其精父母蓋鍾愛之副使之父諱潤字汝
濟任鳳縣知縣娶趙氏生五子三女繼娶陳氏生三子
二女副使行三諱綰字玉卿中弘治己未進士授刑部
主事歷四川按察司副使先娶程氏有賢行玉卿在刑
部程氏病故擇可以嗣之者親黨咸謂今安人為宜玉
卿乃禮聘娶焉郝氏族大以蕃安人事上接下咸有禮
法衆謂其賢足繼程氏正德闕年玉卿考刑部主事滿

贈父如其官贈母及程氏俱安人許氏封安人正德己巳玉卿擢四川僉事以道嶮匹馬之任安人與妾李氏留家居程安人之歿也遺子二女一長子天次子亦病安人始生子九疇在襁褓安人撫育教訓極其辛苦閨門斬斬人咸稱之甲戌玉卿以考滿擢副使鄉官有與之不睦者會其人在言路乃劾之遂致仕已而次子及妾俱故女適舉人程永吉戊寅玉卿亦病故時疇方九歲安人哀毀之餘撫養幼子綜理家政備及辛苦紡績

以夜繼日故家業不墮益崇九疇稍長成教以讀書繼父志遂補郡庠弟子駸駸向進為之娶子女為配親黨僉謂安人自此可安享後福矣不意於嘉靖十年十二月感疾遂卒蓋月之初九日是也安人生弘治己酉三月二十四享年四十有三而已嗚呼痛哉子九疇卜以明年二月十有七日啓其父副使之壙而祔塋焉先期來請銘嗚呼予又安得不為之銘銘曰人倫之道夫婦為首内外克諧庶幾不朽嗟嗟安人厥德孔厚為婦而

婦為母而母衆稱大賢云胡不壽夫婦同藏尚福爾後
靈石儒學教諭王先生墓誌銘

嘉靖癸巳五月五日友人王宗賢先生以壽終於正寢
子制等卜以歲八月三日塋先生于先塋之次先期具
狀來請銘按狀先生世為河內人云云瑯竊以為士之
生世固自有幸不幸以先生之學之行可以遠到而乃
官止於師儒年不逮七十可謂不幸然較之齷齪歿世
者則有間矣謂之大不幸不可也語稱善積而後顯先

生自高祖以迄今家傳詩禮世尚忠厚善之所積厚矣
安知其後不大顯乎季子問臣蔚有才名其在此乎其
在此乎謹為之銘以徵其後銘曰於乎先生學博德厚
位不大顯命也孰咎官為師儒不為不偶年幾七十不
為不壽有子而才將大而後於乎先生可以不朽

蕭生墓誌銘

茂才蕭生以疾卒於正寢父兄將以今年九月九日祔
塋於城東先塋之次迺以姻家李拱之先生所為狀請

銘於予嗚呼予豈忍銘生之墓耶念惟生從吾游踰年
矣刻志向學駸駸上進望其可以遠到迺止於此每思
之輒為悽惻今亦安能執筆作為語言以益其悲耶又
念生從吾游聞吾一言有契於心輒喜形於色今雖已
矣安知冥漠之中不望吾之有言以開其意耶嗚呼痛
哉嗚呼痛哉生名鵬未冠未字其先為雲夢人初祖曰
榮仕偽漢陳友諒八衛指揮使後歸附我太祖高皇帝
累以戰功授黃州衛百戶陞太原衛左所副千戶卒塋

黃岡縣榮子曰忠襲官歷陞河南都指揮同知掌印卒
塋岳州忠子曰誠襲任懷慶衛指揮僉事卒塋懷城之
東誠子曰敬襲職中正統八年武舉狀元授總戎副帥
敬次子曰禮人物豐碩有大度隱德不仕以財雄鄉里
嘗遇凶歲出穀千餘石以賑饑人皆德之禮生三子孟
曰銳仲曰鑑季曰鉉娶武氏本衛指揮俊之孫此則生
之父母也生自幼凝重寡言笑不與羣兒嬉稍長舉動
如老成人年甫九歲入小學讀書日記千百言十歲能

屬對知作四書破承十三習書經通大義間嘗謁督學
憲僉劉公憲副文公告考入學俱蒙優獎令其加勉讀
書雖未見錄莫不以遠大期之鄉里胥慶曰蕭氏有子
矣年十七始從予游朝夕講肄雖隆冬盛暑不倦予甚
愛之正德戊寅春予往居南尚村別業生亦從築室就
學日益刻苦每月止一歸省問安畢即來不留私室夏
五月感疾回家調理猶手不釋卷秋七月疾革語其父
兄曰我受祖母兩伯眷顧暨父母鞠育之恩未有一日

報今命數至此終天之恨豈能瞑目於地下耶言既洎
注如雨左右亦相向大哭越數日卒時則正德十三年
戊寅歲八月初四日巳時也距其生弘治十四年辛酉
歲十一月二十一日亥時得年纔十有八娶葛氏本衛
千戶堅之女無子止一女名月嬰尚在襁褓生雖生長
富貴家然於聲色玩好畧不動念惟一意讀書而已其
天性孝友人尤難及上而祖母暨諸父母下而羣從兄
弟無不鍾愛生於臧獲輩亦莫不得其心母嘗感風疾

生朝夕侍湯藥不離左右生寢衣不解帶與人交汎愛而親仁以此內外無間言衆方期其遠到而止於此嗚呼痛哉古稱爲善有後又稱仁者壽生之家世積善人所共推而生又溫粹恭謹可謂有仁者之資矣迺至於此何耶陰陽交錯五行迭運故徧駁者衆而粹美者間一值焉以其間值之難故其數多不能長生豈得其粹美而不能長者耶不然何以至於此耶太虛不能不聚而爲萬物萬物亦不能不散而爲太虛聚散有時神則

無間冥漠之中玩斯悟斯庶可以釋其終天之恨而瞑目乎嗚呼痛哉

墓銘

寧國府同知鈍齋宋先生墓銘

史傳循良詩稱豈弟古道淪胥有識斯喟懿哉寧國於古克繼守官廉平治民愛利視彼巧宦趨者如市彼以爲榮我以為穢爵不配德於我何愧長者之稱縉紳無二嗟哉宜人克與同志勒銘貞珉以詔來世

西郊宋處士夫婦墓銘

孔村之原沁河之渙西郊先生歸神於此夫婦同藏爰
笑爰語孔吉孔安福爾孫子

墓表

誥封餘姚郡主墓表

聖人立教善善恒急而惡惡恒緩惟其急於善善也故
善雖小而必揚惟其緩於惡惡也故惡必著而始罰衛
世子共伯蚤死其妻共姜守義父母欲奪而嫁之共姜

乃作柏舟之詩以自誓夫婦女之道從一而終則夫亡而不再醮亦常行也夫子刪述六經垂憲萬世乃取柏舟之詩而錄之汲汲然惟恐其無傳於後此其意何哉嗚呼不有所短誰稱其長禮教不修風俗淫蕩雉鳴狐綏之聲盈於遠邇其可嘆者多矣夫子錄柏舟之詩夫豈得已哉稱一人之善所以勵衆人之未善褒表其既往所以示勸戒於將來也聖人立教之意遠矣我聖祖以禮教治天下令民間婦女幼而夫亡守義老而不改

節者奏聞旌表法古意也至於皇家婦女則自鄉君以上俱禮無再醮蓋欲宗室人人皆入於禮教之內不止待之如凡民而已也其齊家正內之化蓋有遠過於前代者矣然由是姬主之善行懿德亦往往不傳於世君子蓋不能不致意焉若餘姚郡主其殆有善行懿德而未傳於世者乎主宗室鄭簡王第九女夫人于氏之所生也工容言德皆可稱述年十九選配誥封中奉大夫甄公廷輔相敬如賓雖在燕居未嘗狎暱公邁疾主躬

奉湯藥未嘗離左右公卒哭踴屢絕時子濟時甫三歲
泣而撫其頂曰吾所以不得從爾先人於地下為汝故
也既塋即不御脂粉不飲酒聽樂惟以祀先教子為事
閨門內外蓋斬斬如也聞有放蕩不謹者即顰蹙曰奈
何辱帝王家也絕不與往來由是主節操之嚴內外無
不聞嘉靖癸巳十二月朔日以疾卒於正寢訃聞朝廷
賜祭塋如制主既與中奉公同塋矣子濟時復請予表
其墓予惟主奉先教子睦親逮下俱可稱述而孀居之

節尤為可敬故特表而出之使得與共姜之賢同垂不朽於風俗庶有勸也嗚呼懿哉嗚呼懿哉

康修撰對山墓表

聖人之道經而不迂權而不譎蓋大中而至正者也後世豪傑之士非無作聖之資也而學力未至故於聖人之道或得其偏而不能無失規行矩步毫髮不差曰此聖人之經也而人情物理有所未明處常事而不能得其要遭變事而不能通其權其失也流而為迂排難解

紛變化無方曰此聖人之權也而挾智用術顛倒縱橫
言焉而不稽其所終行焉而不究其所弊其失也流而
為譎譎則不足以服人迂則不足以濟世此古之君子
所以大過人而今之君子所以不及也對山康子其殆
學聖人之權而未至者乎其才甚高其氣甚豪其性甚
真其言行則不切切於規矩之內其取重於當世以此
而見謗於世亦以此使其遇能言聖人之道而與之切
磋而又悉心聽信焉講去其非而益粹其是損其過而

益其不足則其所立豈止於此哉吾又惜對山之不遇也孔子論人以中行為上次則思狂狷謹厚自保者不數也似德非德者則斥以為賊患得患失者則賤為鄙夫其情蓋可見矣對山其殆孔子之所謂狂者乎對山言行之迹墓碑已備茲特論其人品附於墓碑之後使來世知有對山康子斯已矣

白齋張先生墓表

先生姓張氏諱太素山西萬泉縣綿上鄉下樊村人也

父某母某氏先生生而穎悟不凡稍長即從戎練達世故備歷艱苦儕輩敬服年四十餘慨然棄妻子出家為道士禮邵真人弟子程守然為師後游歷名山汎愛有道之士丹經子書靡不涉覽且又食淡四十餘年鹽酪不入口人咸以白齋先生稱之弘治六年癸丑冬來遊天壇樂其山水遂結庵隱居至十一年戊午遂發心修造乃普化十方財物於壇頂建玉帝殿三間南向銅脊鐵瓦且為銅像及侍女爐鼎花瓶大鏡俱備又建天將

殿左右各三間東西向至正德改元丙寅始訖功己巳
奉鄭懿王令旨召修本城玉清宮虛皇閣五間功完復
回天壇西七十里許西陽山結廬修道乙亥省城周府
昨城王孫輔國將軍因有疾禱於天壇有感遣使齎書
幣命太素崇修天壇頂之三清等殿明年訖工嘉靖四
年乙酉本府孟縣善士耿埏等請先生下山於府城北
沁河上修石橋功未完而先生去世矣時嘉靖八年己
丑冬十月十八日卯時也壽八十有五先生平生無疾

異日端坐而化見者皆驚異焉門人奉遺蛻塋於沁橋之許會塋之日四方之衆雲集塋所門徒薛清澗馮清善輩恐先生之塋處久而或迷沒也乃因吾友任遐齡宋文祥來徵言以表其墓文祥復狀其履歷之始末以授予往年亦嘗與先生相接見其溫厚誠朴退然如愚意其為有道之士也叩以道要則固辭不知寂無一言昔太上有云知者不言言者不知先生其真有道之士耶是固有不可以常情測者矣姑撫其履歷之始末俾

勒之石四方之人百年之後有慕先生之道而欲拜其墓者其尚有感於斯文也哉

祭文

祭仇儀賓玉松

維嘉靖七年歲次戊子三月壬申朔越三日甲戌南京工部右侍郎懷慶何瑋謹以牲醴庶品之奠敢昭告於宗人府儀賓亞中大夫玉松仇先生之靈曰士或覲面而不相知或越千里而相感者蓋由其心之同不同也

先生處潞州瑯處河內相去殆千里矣先生之賢瑯實慕之瑯之不肖亦蒙垂念豈非心之有所同哉嘗意他日有事山西或得晉拜請教今則已矣嗚呼痛哉寄奠一觴少伸哀慕先生生為賢哲歿為神明庶幾有知鑒茲誠恪尚饗

柏齋集卷十

欽定四庫全書

集部
栢齋集卷十一

詳校官中書臣孫溶

中書臣劉源溥覆勘

總校官中書臣朱鈐

校對官學正臣陳木

謄錄監生臣曹錫爵

欽定四庫全書

柏齋集卷十一

明 何瑋 撰

自序

予髫年得杜律虞註讀之愛其高古顧以方事舉業力不能兼棄去弘治甲寅客有示予以郡處士王錦尚綱所作詩數首喜其清新可愛迺作二詩貽之因與倡和明年而尚綱物故予不復作詩又明年而通渭王老先

生來守懷慶雅好吟咏或以予名薦迺作二詩上之然
而非所樂也再明年先生以外艱去任壬戌予徵倖登
第復幸與天下名士讀書翰林迺復留意學詩未幾有
感遂不竟學後雖濫竽詞職之後時或應人之求有所
述作然終不能工也故俱不存稿邇來二十有四年矣
追想所與倡和贈寄諸友死生離合多不相見暇日因
追憶舊稿僅得若干首錄之時復觀省以存友誼至南
京以後所作則隨附於後蓋以備他日之遺忘云耳詩

云乎哉嘉靖四年四月十有八日誌

擬古

獨漉篇四首

獨漉獨漉水深沒穀不畏沒穀但畏車覆

獨寢中夜涼飈襲襟不能告人祇傷我心

洪水湯湯神禹既導槩云自天誰宅四隩

龍惡可馴虎猛可刺豈其無方便我心瘁

五言古詩

入院言志

幽邃隔塵境崢嶸鄰帝居
庭槐鬱青翠窻竹蔭扶疎
翦
緋花傍檻漱玉泉遶除
暎惟翰苑清奚翅夏屋渠
簡拔
幸見收進修敢云徐趨隅
咨問頻對床切磋胥蒐玄
繙
五經考古研六書綺麗戒
浮薄淳樸返古初聖賢果
何
人追逐疇止予惜哉歲華
晚日月催居諸邈矣吾道
大
滄海連歸墟仰瞻際乾蓋
俯視蟠坤輿一得遽自滿
何
異井底魚風高鶴夢驚天
空鵬翮舒行藏有矩範祿
位

慚素虛去去王屋山翹首承明廬

冬日雜興四首

重衾不成寐展轉冬夜長神疲一合眼忽已升高堂衣
裳問煥寒拜跪陳酒漿夢覺雞亂啼渺然天一方草芥
視天下感念焚中腸却憶過庭訓兒當佐虞唐

故鄉千里餘夙夕夢見之門巷宛如昨鄰里亦不移親
朋喜我至談笑相追隨情長苦夜短夢覺恍惚疑諒無
離魂術所見知是非徘徊顧庭宇默默坐如癡

歲暮霜霰滋朔風驚戶牖延觀天地間無物不哀朽松
柏雖堅貞顏色亦非舊玉衡指孟陬睠焉回我首

五岳柱四極衆山難比崇春夏泄化機澗谷披青紅霜
雪任刻轢截業蟠蒼穹天地有正氣令人豁心胸

哭季女二首

我昔自外歸三女中門迎心知非男兒聊得樂此情季
者尤黠慧恩愛鍾平生云胡遽一疾性命倏焉傾旅葬
給孤園煙草縱復橫歸來枕書卧歷歷舊音聲起覓無

所見淚下沾襟纓

女死未及殤其母晝夜啼痛念父子恩亦復為酸嘶叩
門來知己慰釋巧言詞有生會歸盡壽夭理亦齊傷生
遺親憂過哀豈非迷攬涕謝訓言仰視白日西安得干
斛酒終朝醉如泥

得友人書二首

晝寢驚叩門滿耳聲剝啄開門見鄉人新來自河洛袖
中出短書云是故人作開緘見故人反使心腸惡粟夫

家屬空致中體如削元善雖無恙煢煢形影各離索感
此時同遊念前約沈吟久無言矯首歎寂寞去年致中
亡今年栗夫死灑淚向蒼穹吾道真已矣

送方士六首

先生覃懷來復向覃懷去悵望難久留離魂杳烟樹
憶昔讀書舍寄在蓬萊宮長松掛海月短草留春風
同窻四五人肝膽如一身雖存經濟志亦與雲蘿親
先生時來過談笑共抵掌赤水涉波瀾玄珠譏象罔

別來三年餘相思空寄書死者不可見生者猶離居
歸時見故人為問平安否紫氣映冥鴻夜夜頻回首

鶴舟

君家有鶴舟泛泛江中流停橈丹鳳山鼓枻紫麟洲欲
濟沈溺人撐到鳳池頭世事不可意歸棹難久留我家
有虛舟飄飄河內浮東風亦漂蕩邂逅暫夷猶常恐波
浪生命與蛟龍謀子去我所羨我留君不憂解纜未忍
別題詩記綢繆再會未可必相憶商聲謳

贈方矯亭

末世重功名古人崇道義趨向一以殊此取則彼棄孰
知方寸中本是經綸地卓哉矯亭君盛德愚所庇再拜
治心篇賢聖可同志

和暑中韻

把酒對同心推窻見庭樹大化恒寂寥枯榮自來去

七言古詩

楚昭王圖

闔閭甲戈中宵起雷鼓喧轟震千里桔槔火照楚王宮
倉皇逃避浮江水中流風起生白波鼉鼉出沒蛟龍多
小船重載懼沈溺君王淚下雙滂沱王弟王妃並王子
疏者下船誰可使君王手扯介弟衣儲宮相逐慈闈死
嗟嗟薄俗不堪陳兄弟何如妻子親忽見畫圖驚往事
小詩吟罷倍傷神

琴溪宅分韻得紀字

國子先生前太史大暑開筵梵宮裏南風生涼差可喜

況有冰漿浸寒李飲酣執蓋逡巡起一語相期誓終始
諸公盡是天下士瀛海散仙安足擬人生百年風過耳
願竭丹心報天子名垂萬古無泥滓莫笑狂歌同下里
四美二難聊用紀

五言絕句

錢生墳前八景

今錄其七

巉然千仞峯宛似九苞鳥神遊乘興時騎上青雲表

右鳳山翥雲

恠石如秋隼凌空勢欲飛
英賢神采異彷彿見光輝

右鷄石橫秋

九峯如列戟拱立墓門前
見說簪纓後功名繼祖先

右九華列戟

溪水如環帶分明東墓腰
追思游衍日曳履過危橋

右雙溪環帶

秋月映秋波清徹世無比
猶似見親心泪灑楓湖水

右楓湖浸月

英魂招不起應在此徜徉紅綠波相映真成錦繡鄉

右芙蓉簇錦

蘆花秋似雪掩映釣魚舟先世嬉遊處經過淚暗流

右蘆花噴雪

七言絕句

過却金館

却金本是尋常事凜凜清風只至今若使仕途貪者少
夷齊名姓亦消沈

贈星士

杏壇寂寂罕言命
滄海茫茫空問津
今日見君談甲子
守株翻却是高人

玉華山

故鄉王屋比瀛州
足跡中年未一遊
玉華嶺南千萬里
幾時飛舄到峯頭

送陳琴川

此別重逢未有期
東西相望漫相思
一編管見聊持贈

披閱應同對面時

雜畫九首

稚子江邊携水去
野人雲外採樵歸
閒亭晝永紅塵淨
坐看幽禽自在飛

洞簫吹徹大江風
回首曹劉事業空
赤壁仙翁竟何處
青山依舊月明中

直道難容今古同
江邊誰識玉堂公
萬言書在人人讀
惆悵相看是畫中

爭名爭利笑人忙
白水青林且退藏
想是雄心消未盡
却來棋上鬪存亡

兩地相思見面難
暫將微物寄平安
親朋問我年來事
閒看漁翁把釣竿

三鳥不知是何鳥
相向飛鳴不肯休
勸爾早尋高樹宿
蕭蕭蘆葦不禁秋

平川煙草自萋萋
南北東西路不迷
牛飽心閒無外事
揚鞭笑指晚山低

夜深惟恐蛟龍鬪急早倉皇負網歸莫道江湖能遠害
人生隨處要知幾

獨坐江樓思渺然晚雲散盡月當天同心相訪須相見
不比山陰雪後船

懷陸子淵

共誰虛室細談玄東望江雲意渺然憶昔少年今老矣
不堪吟對菊花天

趙子昂鰕圖

曾聞魚藻頌皇都見說杭城殿閣蕪却想王孫揮筆處
也應回首念西湖

梅雪卷二首

梢桠烟消紙帳溫梅花雪影共黃昏興來我欲閒相訪
分付奚童莫掩門

梅花開放雪花飛矮屋斜穿一徑微松頂忽聞玄鶴唳
主人扶杖夜深歸

次鄒謙之除夜韻

為惜佳時暫舉盃春光聞道隔年回憑誰細話真消息
起向前軒翫蚤梅

五言律詩

送秦世觀宣府督糧

曉日都門道春風送客行轉輪明主託規戒故人情政
事忙多錯嫌疑謗易生至誠能動物元不在聲名

送張仲修河東巡鹽

河東鹽課事軍國用斯存錦綺商人富青驄使者尊溝

渠憐赤子霄漢隔金門無限憂時意臨岐不盡論

送楊太常歸省

卿寺遷喬久家山入夢頻暫辭黃閣老歸慰白頭親道
路無多慮將迎有故人聖朝須佐理莫戀錦江春

送穆司成之南監

南京根本地司業範模官今日須君往他年作鑒看文
章回古道風俗障狂瀾惆悵臨岐處天時漸漸寒

歸鴈次孟望之韻

金
何處堪惆悵歸鴻嘹唳音關山千里路光景四時心影
入春風靜聲傳畫閣深冥冥霄漢上羅網莫相尋

酬孟望之次韻

憶昔梁園會憐君意氣投雲霄方並轡風浪復同舟黃
屋空回首清樽且解憂賈生如曉事應不弔湘流

弔林纘妻死節

一醮期偕老殉夫遂殺身閨門憐弱質高節見斯人月
照鴛帷冷苔封馬鬣新異倫關政體誰為奏楓宸

輓謝木齋

四海文章伯三朝柱石臣
林泉謀養浩山嶽慟歸神
門下依仁久天涯灑淚新
東芻無路莫腸斷浙江濱

題楊憲長家手卷二首

萬里青雲路先生次第行
山川頻按節夷夏盡知名
令肅豺狼避恩深草樹榮
猶思補丹宸驅馬向神京

右雲程萬里

黃甲蜚英俊烏臺早致身
澄清曾攬轡忠鯁獨埋輪
勲

業追前輩風聲起後人九原松柏冷相望欲傷神

右激濁揚清

題侯氏忠義錄

海內傳忠義侯君世德長鼓盆居靜室揮劍死封疆祠
柏凌霜翠亭梅帶雪香台山南望處彷彿見輝光

和郭杏東除夜韻二首

除夜園兒女高堂隔老親本無經世策空作去鄉人勲
業看吾友蹉跎嘆此身家山并仕路來往自嫌頻

歲序如流水滔滔不肯休青燈相對坐濁酒斲留身
世將安適才疎拙自謀梅花開雪裏笑爾不知愁

元旦次蒲汀韻二首

身事憐衰白羈栖感歲年雲霞占曉日花柳媚晴川家
遠書難得鴻歸信欲傳高臺頻極目風景故依然
風物開新歲闌山念遠遊慈闈三載別宦邸一身留詩
酒聊乘興烟花豈解愁目窮飛鳥外魂斷仲宣樓

人日

歲事卜陰晴朝來霧氣清天開熙皞象風度笑歌聲豐稔傳鄉國繁華記帝城客居無好況愁減為蒼生

次韻輓陳虛庵二首

虛庵今已矣東望一傷心情愛三秋月剛凝百鍊金猶懸徐孺榻誰和伯牙琴欲寫循良傳翻嫌職掌侵見說毘陵守無如公最賢化行風偃草心靜月當天士頌真君子民歌大有年熙熙並皞皞史筆恐難傳

送左都顏先生入京

聖主坐明堂霜臺振紀綱老臣膺簡命南國倍輝光已
覺豺狼遜遙看鳳鳥翔離筵回首處秋思正茫茫

類庵宅

洞天何處好清愛水晶宮宗伯開華宴羣仙醉碧筒蔗
凝金枕露花動翠簾風豈必浮滄海瀛洲在此中

敝宅分題得觀音梅水

遠映觀音閣梅花烟水寒暗香盈斷浦疎影落輕瀾漱
玉聲相應和羹子半酸瀛洲何異此登眺共憑欄

輓西郊宋處士夫婦

詩酒陶元亮
蕭條住遠坵
傷哉新塚白
愁對舊山青
同穴憐雙璧
傳家在一經
笑談春滿座
人共相儀刑

次杏東元宵韻二首

帝城元夜盛
燈火畫堂深
節序同南北
人情變古今
山河憐晚霽
花柳怯春陰
笑語喧兒女
翻傷老大心
燈火逢元夜
萍蓬嘆索居
感時知我老
得句遣兒書
酒少愁難破
年衰恨有餘
團圓天上月
幾見缺如梳

次對雪韻二首

夜雪深過尺春城礙出遊且斟澆悶酒休上望鄉樓
齒髮直堪念聲名不用流行當謝明主歸去故山頭
感時驚雨雪撫已惜精神鏡裡容非舊天涯歲又新
愁來便枕簟客至強冠巾聚散思今昔相看意更親

七言律詩

四月八日午門賜宴次秉衡韻

節驚蕤英問元初浴佛傳來貝葉書龍陞玉音催賜宴

鳳樓瓊席坐連裾抗章有志同韓愈獻賦無才似子虛
不是聖明重異教欲將奇恠駭吾儒

宗藩孝行

玉樹分枝帝室親昭然誠孝冠羣倫寸心哀慕窮天地
永夜悲號動鬼神高塚松楸頻洒淚名園桃李謾生春
憑誰寫入丹青傳大播遺風起後人

王教之端冊業

慈闈高行並南山文母徽音尚可攀孝子騰書馳驛騎

聖君聞奏動天顏
玉階遣使綸音重
金殿承恩羽扇閒
莫道尋常內家事
帝王風化正相關

送李守正歸崇邑省親

宦途邂逅與君同
又見歸旌逐斷鴻
東觀月明清夢遠
北堂春好壽顏紅
滄溟汗漫魚龍水
平野蕭條草木風
忠孝此行真兩盡
天涯極目思無窮

癸亥雜詩八首

出谷鶯啼楊柳絲
客邊風景似年時
西山凍釋抽新草

上苑春歸入故枝
心念舊遊頻眺望
夢回殘月倍相思
催朝無奈雞鳴早
又逐羣英過鳳池

故園門巷枕黃河
散亂牛羊草滿坡
兩岸夕陽行客棹
一犁春雨老農蓑
撥醅酒熟尊顏醉
擊缶聲喧稚子歌
一別天涯幾芳草
夢回茅屋月明多

黃金臺畔太行隈
千里風光一日回
白馬渡迷芳草合
紫金壇迴曙烟開
笙歌到處留人醉
車馬誰家上冢來
坐想舊遊真似夢
野花黃蝶徧蒿萊

盤谷燕川二月寒馬頭溪水隔天壇黃茅踏遍幽人徑
白石燒成道士丹風煖野禽朝對語月明松鶴夜交歡
採真擬結峯頭屋引領西南盡日看

十里雲霞鎖洞天靈踪千古尚依然老君池水深春雨
黃帝松陰暗曉烟盤谷斷碑芳草外玉川茅屋野花前
別來勝景應如昨歸去繁霜懼滿顛

目窮郊野遍芳菲清曉登樓轉夕暉風撼上階花影亂
雨滋穿土草芽肥採芝商嶺人何處種菊潯陽事已非

同學故人偏自得海鷗沙際共忘機

聞道商山老紫芝百年短景不勝悲紅塵滿眼空憐我
青史流芳竟屬誰杖化葛陂龍去遠笙聞緱嶺鶴來遲
王孫草綠烟汀晚獨倚危欄自詠詩

青春回首思悠悠王屋山高沁水流觀國念存空倚劍
思鄉魂斷獨登樓悲鳴夜月籠中鶴泛濫春波海上鷗
寂寂桑榆斂殘照麗譙吹角使人愁

追輓王戶部

馬鬣西風吹野蒿襄城南望夢魂勞趨塵不及瞻犀表
繼踵空憐識鳳毛玄武掛冠頭正黑青雲倚劍志猶高
是誰寫入巢由傳不說勲名在戶曹

追輓復齋王憲副

清新曾讀復齋詩眉宇居然見紫芝翰苑烏臺憐往事
青蠅白壁恨當時平原草滿鷁飛急孤塚苔荒鶴弔遲
我欲招魂歌楚些乾坤浩渺不勝悲

望泰陵次序庵韻

玄扃一自掩重關惆悵龍髯不再攀
絳節定應歸帝所翠華無復到塵寰
亂峯殘照玄猿哭衰草寒烟石獸閒
載筆小臣凝望久玉樓瑤殿倚空山

送羅戶侯歸成都

腰間錦帶佩雙龍萬里東來謁九重
劍外風烟憐獨往日邊甥舅記相逢
雪消漢水連天闊春盡巴雲入樹濃
麟閣於今待勲烈莫將韜畧老藩封

送野汀祭掃

道途豺虎正縱橫底事歸軒冒險行
霄漢一身明主託江山萬里老臣情
雲迷汴宋懷松檟路入衡漳斂旆旌
回首天門紛羽檄可能鄉社戀尊羹

送潘仲魯使安南

風塵時節送君行萍水分攜百感生
六館交游曾刮目十年離合最關情
山川渺渺蠻中路霧雨昏昏海上城
玉冊已頒王事畢便催車馬轉歸旌

酬李序庵次韻

鞍馬紅塵日送迎
累驚時節變陰晴
白衣蒼狗有何意
流水高山無限情
把酒舊曾臨鄭圃
題詩誰復共韓檠
故人若問年來事
華髮新從鏡裡生

贈侯汝立次韻

黃堂伴食歲棲遲
彤管題詩淚欲垂
疎懶自宜陪鹿豕
奔騰誰復逐龍螭
茅齋夜月談玄榻
野店春風賣酒旗
便好掛冠從此去
帝鄉回首路逶迤

贈黃大行還京師

煌煌使節下神京又見歸旌傍晚行山斗空懸今日意
將迎無復少年情叮嚀稷契煩調護疎懶巢由賴治平
鳳閣龍樓天咫尺紫垣翹首暮雲橫

同館會都下者十有三人以塵世難逢開口笑
菊花須插滿頭歸分韻賦詩予得花字同賦
歸字

朋簪重盍慰睽違仕路年來覺漸非紫極關心明主在
青雲回首故人稀半生歲月閒中過十畝園林夢裏歸

孔孟伊周俱泯沒不須相向欲沾衣

同年郁希正與予同謫開州希正遷南京戶部
偶誦水東日記所載先生送別詩謂其詞意
悲感聞者流涕因索予和漫為賦此詞語高妙
何敢望前人至於情之可悲則固有甚焉者
矣觀者畧其詞而取其情可也

晚風吹雨鬢瀟瀟往事關心酒半銷萍水兩人康叔國
風雲千載孝宗朝喬遷君喜家山近蓬轉誰憐宦海遙

楊柳啼鶉分守處河橋愁似洛陽橋

贈方時舉少叅次韻

道學千年說二程涪州歸詔促裝行也知西監非崇秩
自是清朝忌盛名天姥山高冬月小浙江潮上曉雲晴
歸途紀興囊中稿風便何妨數寄聲

弔同寅許補之次半塘韻

才名籍籍重交游豸繡煌煌寵命優身死空留憂世策
時危難得濟川舟春深人惜甘棠暮月落鶉啼宰樹秋

惆悵手書纔數日却疑蝴蝶夢莊周

次周半塘遊天台韻

隨州詩句敵長城況復登臨逸興生
瀑布泉流山自好柏臺公暇趣尤清
洞間雲鎖人來少橋險風高鳥度輕
笑我塵凡欠仙骨肩與空望晚峯行

送潘氏叔姪還湖廣

西風吹雨正重陽征馬蕭蕭客袂涼
棣萼情知離別苦竹林歸念道途長
南溟水闊搏鵬翼北極天高斷鴈行

遙想紀行詩滿卷莫將幽意弔沈湘

贈伍松月致仕

都憲先生拂袖歸都門相餞惜光輝汀花岸草隨時發
野鳥沙鷗信意飛海上共傳平巨寇江西猶記破重圍
韓侯不隱留侯隱青史千秋說見幾

送鄧二府致政歸膠州

夢覺黃梁萬事空倚闌翹首羨冥鴻懶從赤紱稱循吏
擬向滄浪狎釣翁孤鶴伴吟臨夜月蹇驢馱醉入春風

東西路阻音書少林下知誰笑語同

題鳳圖

虞周世遠太平稀靈鳥翩翩何處飛千載賢王時運筆
九重聖主正垂衣雲開丹穴風初靜日上青桐露未晞
黃髮老臣懷至治羽毛五色望來歸

題淮浦卷

長淮之水東南流美人家在淮上頭滄波碧石有深趣
朝史暮經無外求東風側耳聽黃鳥夜月捲簾招白鷗

畫圖一見擬相訪何處元龍百尺樓

再和石溪

瑤華稠疊逐人來懷抱陰沈為子開高卧袁安甘冷落
孤吟何遜苦摧頽寒多何奈肌生粟飲少空嗟甕有醅
東閣莫嫌無好句眼花不辨雪中梅

齋居四首

齋館寒燈獨不眠譙樓更鼓晚風傳夢歸戲彩花當戶
睡起推窗月在天鶯鶯南飛翔夜樹征鴻北去沒春烟

詩成欲寄同心友，恐惹閒愁到客邊。

瑞靄祥光滿戶庭，高瞻黼座儼威靈。
讚傳行禮千官肅，工奏登歌衆樂停。
對越聖容深穆穆，降臨神馭遠冥冥。
江湖翹首層霄上，愁絕孤臣兩鬢星。

公庭吏散集林雅，齋室端居免坐衙。
春滿禁城偏此地，風傳歌管是誰家。
遙瞻紫極懷天表，喜見彤雲護日華。
潦倒揚雄思獻賦，却嫌詞藻近浮誇。

小齋端坐念離居，佳句傳來重起予。
霄漢故人俱老矣，

廟堂勲業竟誰歟情同杜甫非耽酒迹異虞卿懶著書
回首故山清夢斷三年塵土滿征裾

秦淮一覽閣二首

好景應憐畫不如小樓非止為觀魚坐邀吟客頻登賞
時有仙人共起居春水泛紅花落後晚山增翠雪消餘
荔枝盧橘非真有却笑前賢賦子虛

畫閣臨流想像題倚欄翹首覺天低名花無數侵簾入
好鳥多情傍戶啼近水迢迢經雨綠遙山隱隱拂雲齊

從來吏隱難兼得城市還驚似澗溪

輓薛處士倒用舊韻

雲暗天邊處士星客窻寒雨夜冥冥輶車忽自京師返
相杵懸知里社停別圃烟花懷地主草堂猿鶴怨山靈
詩壇舊友應多在灑淚東風到戶庭

贈貳尹李大人致政西歸

數載哦松興有餘一朝解組意何如摩空倦鳥投深樹
過雨閒雲斂太虛酒熟邀朋談往事心閒教子讀遺書

林泉自有無窮樂肯為浮名嘆索居

東津招飲贈詩酬此謝愛

烏啼花發報新年對酒論詩興藹然甲第韓歐元共榜
風流李郭更同船此時酒盞寧辭醉他日詩筒莫厭傳
離合此生知未免笑談回首社壇邊

送唐府丞送母還鄉

牙檣錦纜奉慈顏兩岸人誇舞袖斑京兆平刑聞一笑
帝城迎養記三山長江渺渺征帆急落日亭亭去鳥閒

畿甸焦枯望霖雨石榴花發候君還

清風亭賞牡丹次華泉韻

上苑芳菲第一叢何年移入禮臺中堪嗟富貴非前日
誰信清高有舊風夜月皎如銀燭照曉烟輕似碧紗籠
不須對此頻惆悵萬品榮枯屬化工

再次韻

花時載酒賞芳叢感慨還生悵望中一點心存常向日
數年枝老太禁風今朝相對慚衰白明早重來嘆落紅

乘興題詩聊一笑敢嫌詞藻未能工

次華泉賞黃牡丹韻

寶欄春晚爛生光照眼花開正艷陽唐世御袍還愛赭
漢宮粉額盡塗黃更憐上苑風前色兼有東籬月下香
老厭妖嬈愛清雅幾回徐步過前塘

次仰止送周貞庵韻

四月南風錦纜斜送行冠蓋集江涯謾嗟行役還高詠
共說詩壇讓大家檣櫓影搖波底月旌旗光映岸傍花

樓船到處鯨鯢避博望虛傳海上槎

送張申臺巡撫遼東

帝城東北是遼陽旌旆悠悠去路長千里山川歸節制
萬年襟帶此封疆迅雷震處開聲俗甘雨零時潤瘠鄉
見說醫閭秀無比政閒應上最高岡

聖節習儀朝天宮次華泉韻

風馬瀟瀟夜氣森江湖廊廟幾關心太平天子春秋富
衰老孤臣感念深詞苑濫竽憐往昔奉常叨祿愧而今

千秋金鏡無由上萬歲遙同祝壽音

次日習儀太常不預再次華泉韻

玉宇涼生萬木森珮環趨走念同心風傳鼓角朝儀靜
雲擁旌旗帝座深祝壽已聞頻似昔賡歌還羨不如今
獨慚下里巴人曲難並黃鍾大呂音

東園亭上次華泉聯句韻

細細巖風吹桂香微微江雨送新涼
莫思白髮愁千種且對青山醉一場
舞袖輕搖秋水靜歌聲高入暮雲長

良辰美景真須惜屈指東籬菊又黃

和郭杏東九日韻二首

吟苦偏愁白髮催故人何事又詩來籬邊黃菊花相對
客裏清樽酒自開南國此時聊遯跡北扉當道正需才
嗟予潦倒無他望獨立西風想釣臺

重陽細讀黃花句懷抱因君一暫開杜甫當年已作客
陶潛今日正銜盃殊方久廢登高興青眼誰憐濟世才
北望親闈腸欲斷塞鴻頻到少書來

送貞庵進表分韻得文字

星占營室動天文世廟新開自聖君
入賀中丞凌驛雪
送行僚友惜江雲
歌聲緩處詩初就
風力柔時酒半醺
待漏寒多不成寐
鳳樓霜角幾回聞

送寅長南屏老先生入覲用樾岡韻

官署方歡伴食新
離筵無奈便傷神
三千里外朝天路
四十年來報主身
殿上諮詢瞻日月
淮南歌頌記陽春
工曹造作如星火
休說寬仁舊撫巡

病歸留別諸友次浚川韻

幾年塵土污華簪歸想南莊樹影深
廊廟山林元異趣野雲沙鳥是知心
不嫌鄰叟挨肩坐却恐明公枉駕尋
沈水烟消荻簾捲綠槐高處一蟬吟

次鳳凰臺韻

春來閒上鳳臺遊極目長江天際流
紫氣蔥蔥籠殿闕蒼烟漠漠冪林丘
功名誰畫麒麟閣詞藻空傳鸚鵡洲
且對青山傾綠醕莫教明月笑人愁

送陳侍郎奏績京師

少宰朝天及早春羣公相餞集江津
九霄宮殿皇都遠
千里鶯花驛路新
鵲樓頭傳刻漏
鳳凰池上聽絲綸
袖中應有山公啓
見說君王訪正人

齋居次韻

南國齋居萬慮輕
北辰翹首正關情
紫壇香藹通金闕
絳節雲開下玉京
樂奏笙簫傳禁衛
駕回車馬隘都城
人心歡悅天心享
共賀今年大禮成

弔前溪景伯時

車馬穿林踏曉晴山河揮涕掩荒塋玄堂漫刻新碑誌
丹旂猶題舊姓名文字百年空翰苑英靈千古閉佳城
鳳臺門外經行路彷彿鳴騶月下聲

送樾岡

青春旌旆照長途相餞中丞赴上都聖主臨朝求治理
遠人傾耳聽嘉謨兩淮烟水連南北三晉雲山似畫圖
見說經過豺虎避至今歌頌滿樵蘇

送松月

江西傳檄奏奇勲，海上揚旗淨寇氛。
憲府論功誰並駕，銓曹書最已前聞。
大同金鼓驚邊月，甘肅烽烟肅隴雲。
自古全才兼將相，莫教人說范希文。

同年殷僉憲遷居伍松月有贈因和二首

華居新買傍城陰，流水橋南帶茂林。
車馬稀疏知地僻，烟花撩亂覺春深。
醉扶竹杖看魚躍，困倚藤床聽鳥吟。
最愛三山當戶牖，晚峯相對翠千尋。

不受塵埃半點侵誰知城市有山林鳥啼花落簾櫳靜
月白風清苑宇深酒熟時招鄰父飲詩成閒對細君吟
興來策杖園中去萬紫千紅自討尋

聞蒼谷來

騎驢出郭俟龍湫恠事相傳說未休

蒼谷擬改恠
事為勝事

病我

不能遵往轍更誰堪望繼前修春風滿面形容隔華髮
盈簪歲月道嘉靖九年元日曉旆旌應記過懷州

贈通渭王應祥

三十年前舊弟兄一樽相對眼偏明
雲山此去依春隴車馬何時復帝京
世易蹉跎男子志老難離別故人情
關中知己如相問報道新來欲避名

五言排律

送王大歸通渭


五月天方暑端居汗似漿
君行胡汲汲使我意茫茫
惜別情難已銜恩恨豈忘
先公開棨戟賤子侍門牆
禮過惟呼字才微許擅場
君時方弱冠顏色美清揚
設醴情

偏厚論文興未央
睽違驚歲月今昔痛存亡
雅望虛丹棘新阡
弔白楊薤歌空涕淚
芻蕘阻關梁
鶚薦恢庭訓
鵷飛入帝鄉
萍蓬憐邂逅
弓冶見輝光
垂翅雲霄遠
歸鞭道路長
別懷方浩渺
時事倍淒涼
四海豺狼滿
千秋鳳鳥藏
偃戈空屈指
漂杵幾沾裳
濟世須英俊
逢時貴激昂
到家先展墓
調膳日升堂
竹簡功須進
棠花色並芳
二年齊旦暮
萬里看騰驤

輓貳守宋先生

耆壽彫零盡傷心一咏詩典刑存後進風槩想當時有
美鄉邦彥真為俊秀師賦梅才自遠渡蟻慶猶遺赤縣
官初試青雲譽早馳高陽留惠愛仁壽振綱維鰥寡頻
流涕權豪愧俛眉陽城書考下顏駟轉官遲海畔僉廳
擢江南貳守推銓評方少愜公鬢已如絲守制還鄉里
投簪訪故知鄒陽雖繫獄公治竟無私未盡鷗鵬樂俄
興鵬鳥悲歸神餘馬鬣傳世有麟兒憶昔叨京宦曾經
仰令儀抵家公不見懷舊淚空垂寂寞生芻蕘淒涼有

道碑松楸頻注目翔鳥下高枝



柏齋集卷十一